

## LIPOK

1 Tetenzük nung Tsüngremi anüing\* aser alima poktetdaksü. <sup>2</sup>Aser alima kecha mekümteti aser tazüngla liasü, aser amang tzüyim manung liasü, aser Tsüngrem tanela tzü manung liasü: aser Tsüngrem tanela tzü manung moka liasü. <sup>3</sup>Aser Tsüngremi ashi, Tesangwa liang; aser tesangwa liasü. <sup>4</sup>Tsüngremi tesangwaji junger ta ajitet; aser Tsüngremi ammag nungi tesangwa lemdang. <sup>5</sup>Aser Tsüngremi tesangwa dang Anogo ta aja, aser ammag dang pai Aonung ta aja. Aser aonung o anepdang naji, anogo mezüngbuba liasü.

6 Aser Tsüngremi ashi, Tzü tom nung lungtena kümang, aser iba jagi tzü nungi tzü lemsadakjang. <sup>7</sup>Aser Tsüngremi lungtenbaji yanglua, lungtenba tamalen aliba tzü nungi lungtenba telunglen alibe tzü lemsa; aser yamaji liasü. <sup>8</sup>Aser Tsüngremi telungtenba dang Anüing ta aja. Aser aonung o anepdang naji, anogo tanabuba liasü.

9 Aser Tsüngremi ashi, Anüing kübok aliba tzü tesem ka nung sentenang, aser ali takong adokang; aser yamaji liasü. <sup>10</sup>Aser Tsüngremi ali takong dang Alima ta aja; aser tzü sentenba dang pai Tzüyim ta aja: aser Tsüngremi aji junger ta ajitet. <sup>11</sup>Aser Tsüngremi ashi, Alimai rem o, metsü atangba süngo-lio o, tejang atangba süngdong tapu tapu shia süngjang atangba, kechi nung pai pei metsü jang lir, aji alima nung adokdakjang; aser yamaji liasü. <sup>12</sup>Aser ali jagi rem o, metsü tapu shia atangba süngo-lio o, tejang atangba süngdong, tapu tapu shia tejang kechi nung pei pei metsü jang lir, aji adokdaksü aser Tsüngremi aji junger ta ajitet. <sup>13</sup>Aser aonung o anepdang naji, anogo tasembuba liasü.

14 Aser Tsüngremi ashi, Anüing lung-

tenba nungji aonung nungi anogo lemdangtsü asoshi tesangwatem lidakjang; aser item temaitsü asoshi, aser tsüngkem mungpu asoshi aser anogo aser küm asoshi sang; <sup>15</sup>aser alima nung sangwatsü asoshi item anüing lungtenba nung tesangwa liang: aser yamaji liasü. <sup>16</sup>Aser Tsüngremi tesangwa sangwatsü, aser tilabaji aonung sangwatsü asoshi; ano pai petinutema yanglu. <sup>17</sup>Aser Tsüngremi alima nung sangwatsü asoshi, <sup>18</sup>aser anogo aser aonung kibur akümtsü, aser ammag nungi tesangwa lemdangtsü asoshi, item anüing lungtenba nung yutsü: aser Tsüngremi aji junger ta ajitet. <sup>19</sup>Aser aonung o anepdang naji, anogo pezübuba liasü.

20 Aser Tsüngremi ashi, Tzü nung taküm shiruru telok agi sünga liang, aser ozütem ali temalen anüing tom nung yimzüang. <sup>21</sup>Aser Tsüngremi tzüyim shiruru tulutemji, aser arakzüba taküm shiruru ajak, kechi tzü nung nungzüa liasü, tapu tapu aser tashikang aketba ozü ajak tapu tapu poktetdaksü: aser Tsüngremi aji junger ta ajitet. <sup>22</sup>Aser Tsüngremi parnok moaja ashi, Tejang rena tangang, aser kümang aser tzüyim nung tzüji süngjang, aser alima nung ozütem rendakjang. <sup>23</sup>Aser aonung o anepdang naji, anogo pungububa liasü.

24 Aser Tsüngremi ashi, Alima nung taküm shiruru pei tapu tapu, kiset shiruru, ali nung ayazüba, aser alima shiruru pei tapu tapu adokdakjang; aser yamaji liasü. <sup>25</sup>Aser Tsüngremi alima shiruru pei tapu tapu, aser kiset shiruru pei tapu tapu, aser ali nung ayazüba kechisarena pei tapu tapu yanglu: aser Tsüngremi aji junger ta ajitet. <sup>26</sup>Aser Tsüngremi ashi, Asenoki nisung asen ama, asen mesükba nung yangludi: aser tzüyim ango madak aser anüing ozü madak, aser kiset shiruru madak aser alima

\*Kodang Tsungremi yanglutsu tenzuk.

ajak madak, aser ali nung ayazüba ajak madak parnok kibur sang. <sup>27</sup>Aser Tsüngremi pei ama nisung poktetdaksü, Tsüngrem mesükba nung pai pa poktetdaksü; tebur aser tetsür pai parnok poktetdaksü. <sup>28</sup>Aser Tsüngremi parnok dang ashi, Soyapokyang, aser jenti renang, aser alima süngdakja aji azüokang; aser tzüym ango madak, aser anüng ozü madak, aser alima nung arakzüba taküm aliba kechisarena madak, kibur sang. <sup>29</sup>Aser Tsüngremi ashi, Ajiang, alima ajak nung aliba metsü atangba süngo-lio ajak aser süngdong ajak kechi nung metsü jang atangba süngjang lir, ni nenok nem agütsür: nenok asoshi aji chiyungtsü alitsü. <sup>30</sup>Aser alima shiruru ajak nem, aser anüng ozü ajak nem aser ali nung ayazüa aoba ajak nem kechi nung taküm lir, ni sünglio tajem chiyungtsü asoshi agütsür; aser yamaji liasü. <sup>31</sup>Aser Tsüngremi pai yangluba ajak angu, aser ajiang, ya kanga junger liasü. Aser aonung o anepdang naji, anogo trokbuba liasü.

**2** Yamaji anüng o, alima o, aser parnok telok renem. <sup>2</sup>Aser tenetnübuba nung Tsüngremi pai yangluba mapa atem; aser tenetnübuba nung pai yangluba mapa ajak nungi pai mungzük. <sup>3</sup>Aser Tsüngremi anogo tenetbubaji moaja meshitet; kechiaser iba nung pei mapa ajak nungi, kechi Tsüngremi pokteta yanglu, pai mungzük.

**4** Itemi anüng ali putu, kodang parnok poktetdaksü koba anogo nung KIBUBA Tsüngremi alima aser anung poktetdaksü. <sup>5</sup>Aser alima nung ano süngdonglidong maliasü, aser sungo-lio ano memeku; kechiaser KIBUBA Tsüngremi alima nung ano tsünglu marudaksü, aser ali inyaksü nisung kata maliasü; <sup>6</sup>saka tzüsü alima nungi tua ali jak metendaksü. <sup>7</sup>Aser KIBUBA Tsüngremi ali agi nisung yanglu, aser pa teni nung taküm tangula apuoktsü, aser nisungji akümlir ka aküm.

<sup>8</sup>Aser KIBUBA Tsüngremi anüdoklen atsüki ka Eden nung yanglu; aser idakji pai peii yangluba nisung toktsü. <sup>9</sup>Aser ali nungi KIBUBA Tsüngremi tenükdang tajinütsü aser chiyungtsü asoshi tajung süngdong ajak meidaksü; taküm süngdonga atsüki tiyong nung, aser tajung o tamajung metetba süngdong pai meidaksü. <sup>10</sup>Aser ayong ka atsüki metena ayimtsü asoshi Eden nungi tugu; aser idak nungjagi aji lemsaa ayong pezü aküm. <sup>11</sup>Mezüngbuba tenüng Pison; iba jagi hon aliba Habila lima ajak meketbanger; <sup>12</sup>aser iba lima honji tajung; aser idakji dellium aser oniks lung lir. <sup>13</sup>Aser ayong tanabuba tenüng Gihon; iba jagi Kush lima ajak meketbanger. <sup>14</sup>Aser tasembuba ayong tenüngji Hidedekel: ibaji Asiria anüdoklen ayimer. Aser pezübuba ayongji Eufrates. <sup>15</sup>Aser KIBUBA Tsüngremi nisungji ania arua pa Eden atsüki inyaksü aser anüktü toktsü. <sup>16</sup>Aser KIBUBA Tsüngremi nisung dangji melaa ashi, Atsüki süngdong ajak nungi nai odang chitet: <sup>17</sup>saka tajung o tamajung metetba süngdong nungi nai techi; kechiaser nai koba anogo nung iba nungjagi chidir na atangji asütsü.

**18** Aser KIBUBA Tsüngremi ashi, nisungji kija alitsü majung; ni pa asoshi teyarir tetemsü ka yangludi. <sup>19</sup>Aser ali agi KIBUBA Tsüngremi arem shiruru ajak aser anüng ozü ajak yanglur pai kechi tenüngsa jadiri ta nisung dang jagi anir aru; aser nisung jagi taküm shiruru shia dang kechi aja, aji pa tenüng aküm. <sup>20</sup>Aser nisungjagi kiset shiruru ajak nem, aser anüng ozü ajak nem, aser arem shiruru ajak nem tenüng agütsü, saka nisung asoshi teyarir tetemsü ka mangu. <sup>21</sup>Aser KIBUBA Tsüngremi sümanga mejangba nisung dakji adokdaksü, aser pa mejanga ao; aser pai pa tesaret ka agiteta aji melena shi mejembangtsü. <sup>22</sup>aser tesaret, koba KIBUBA Tsüngremi nisung dak nungji agitet, iba jagi pai tetzür ka yanglu

aser la nisung dangi anir a o. <sup>23</sup>Aser nisung jagi ashi, Ibai tang kü teret nungi teret, aser kü shi nungi shi: la dang Tetsür ta ajatsü, kechiaser la Tebur nungi agitet. <sup>24</sup>Anungji nisungi pei tebu aser pei tetsü toktsür, pei kinungtsü den sentepa alitsü; aser tena shi ka dang alitsü. <sup>25</sup>Aser tena prungla mangsa liasü, nisung o pa kinungtsü na, aser maktepi liasü.

**3** Tang KIBUBA Tsüngremi yangluba arem shiruru ajak dang per tesangraba liasü. Pai tetsür la dang ashi Atangji, atsüki aliba süngdong kecha nungi techi ta Tsüngremi ashi asü? <sup>2</sup>Aser tetsür lai per dang ashi, Atsüki aliba sungjang onoki chitet; <sup>3</sup>saka koba süngdong atsü tiyong nung lir, iba süngjang techi aser tekongshi, aji mesüra ashiko nenok asütsü, ta Tsüngremi ashi. <sup>4</sup>Saka peri tetsür la dang ashi, Atangji nenok masütsü: <sup>5</sup>kechiaser kechi anogo nung nenoki ibai chidir idangyongji nenok tenük lapoka, nenok Tsüngremi ama, tajung tamajung akümtsü ta Tsüngremi metet. <sup>6</sup>Idangji tetsür lai iba süngdongji tachitsü asoshi tajung, aser tenük dang azüapungtsü, aser shisatsü kaa kümdaktsütsüsa süngdongji apayua, lai iba süngjang ongzüka achi; aser lai kinungpu nema agütsü aser pai achi. <sup>7</sup>Aser tenaprunla tenük lapok, aser parnok mangsa ta meteta aküm; aser parnoki mungu o arütep aser pei asoshi teperem sü yanglu. <sup>8</sup>Aser KIBUBA Tsüngremi anogo mopung tanepdang atsüki nung jajaba ola parnoki angashi; anungji nisungba o tebutzü na KIBUBA Tsüngremi süngdong nungi atsüka atsüki süngdong rongnung ali. <sup>9</sup>Saka KIBUBA Tsüngremi nisung dang jaa ashi, Na kong ali? <sup>10</sup>Aser pai ashi, Ni atsüki nung ne ola angashir, ni mangsa asü nung tsüba atsüka ali. <sup>11</sup>Angji KIBUBA Tsüngremi ashi, Ne mangsa ta ne dang shibai ashi? Ni ne dang kechi süngdong nungi techi ta ashi aji nai achi asü?

<sup>12</sup>Idangji nisungjagi ashi, Koba tetsür nai kü den alitsü agütsü, lai iba süngdong nungi ku nem agütsü, aser in achi. <sup>13</sup>Idangji KIBUBA Tsüngremi tetsür la dang ashi, Nai ya kechi inyak? Tetsür lai ashi, Peri ni kelakoktsü, aser ni achi. <sup>14</sup>Angji KIBUBA Tsüngremi per dang ashi, Nai ya inyak nungji, kiset shiruru ajak aser arem shiruru ajak dang taoba na atakatem kaotsü; tepok agi na juzütsü aser ne arishi tepiyong aoyi achitsü. <sup>15</sup>Aser ni na o tetsür na yongtsü nung, aser ne kidong o lar kidong na yongtsü nung tsükchitep yutsütsü: pai ne kolak ajemsatsütsü, aser nai pa shibalang yirutsütsü, <sup>16</sup>Pai tetsür dang ashi, Ni na nubenba timtem tali kümdaktsütsü; na kangshia tanur amungtsü, aji saka ne azüapungba ne kinungpu dak alitsü, aser pa ne madak kibur akümtsü. <sup>17</sup>Aser Adam dang pai ashi, Kechi süngdong nungi ni ne dang techi ta ashi, aji nai ne kinungtsü o angar achi nung, na atema ali nung atakatem kaor. Ne arishi tepiyong angnungji belemseta chiyungtsü angutsü: <sup>18</sup>ayi aser ai iba jagi ne dang meitsütsü; aser nai arem nung meiba süngo-lio achitsü. <sup>19</sup>Na meyipa ali maküm tashi, pei tejak nungi asentsü yima chiyungtsü angutsü; kechiyong na ali nungi agitet; kechiaser na ali lir, aser tanaben ali küma aotsü. <sup>20</sup>Aser nisungjagi pei kinungtsü tenung Eva ta aja; kechiaser la akümlir ajak tetzü. <sup>21</sup>Aser KIBUBA Tsüngremi Adam aser pa kinungtsü asoshi shikep tola yanglua parnok nem semtsü.

<sup>22</sup>Aser KIBUBA Tsüngremi ashi, A-jiang, nisungji asenok rongnung ka ama, tajung tamajung meteta, kümogo; ashiko pai tang teka songtoka taküm süngdong ongzüka chir teti taküm alitsü. <sup>23</sup>Anungji KIBUBA Tsüngremi kechi li nungi pa agitet, iba li tudaktsütsü asoshi pa Eden tsüki nungi odaktsü. <sup>24</sup>Yamaji pai nisungji aridok; aser taküm süngdong le-mang anütsu, Eden tsüki anüdoklen Cherubim, aser ajaklen meyipshiba sent-

süprang nok ka ayu.

**THE HOLY BIBLE**

*Ao Naga (Re-edited)*  
1981

1,000 Copies--83



The Bible Society of India  
20 Mahatma Gandhi Road  
Bangalore

*Available at*  
Bible House, Students' Field  
Shillong 793002